

rem Theotecnus designavit, Eusebius & ejus successor Acacius, qui Sardicæ depositus fuit, & Gelasius sub Theodosio.

VII.  
SCYTHOPOLIS  
METROPOLIS  
SECUNDÆ PA-  
LÆSTINÆ.

Scythopolis civitas præclara & Metropolis secundæ Palæstinæ, medio miliario à Jordane tantum distans in satis grata planicie sita est. Hanc prius conditam à Libero Patre vult Solinus, sed quicquid sit, prius Betan & Nyssa dicebatur, nomenque Scythopolis tantum obtinuit postquam à Scythis quasi de novo instaurata est, superbisque ædificiis exornata. Nunc penè diruta est, parvumque oppidum à paucis incolis habitatum. Patrophili hujus Episcopi sæpè fit mentio apud authores historiæ Ecclesiasticæ, numeraturque inter Arianos defensores à Theodoreto, licet Concilio Nicæno inter alios Episcopos subscripserit. Valens etiam legitur in Sardicensi, Saturninus in Constantinopolitano primo, Olympius in Chalcedonensi, Theodosius in Constantinopolitano sub Agapeto & Menna, & Hierosolymitano sub iisdem.

VIII.  
PETRA ME-  
TROPOLIS TER-  
TIÆ PALÆSTI-  
NÆ.

a D. Athan. in  
Epist. ad Sol.

Petra Metropolis tertiæ Palæstinæ, civitas munitissima in monte sublimi sita ad fines Moab, apud Ptolemæum legitur in descriptione Arabiæ Petræ. Arcen & Arcen Josepho dicitur, & aliquando Archim teste Wiffemburgio. Aliaque est à Petra Palæstinæ, quæ sedes Episcopalis tantum fuit, ut clare probatur ex D. Athanasio<sup>a</sup>, qui Asterium Petræ Palæstinæ Episcopum vocat, & Arium Petræ Arabiæ. Dicitur autem in duabus Notitiis Græcis antiquis Metropolis tertiæ Palæstinæ, reveraque fuit, non paucas civitates Episcopales sibi subditas habens, ut ex ipsis inferius patebit.

IX.  
HIEROSOLY-  
MITANUS PA-  
TRIARCHA  
PROPRIA CA-  
RUIT PROVIN-  
CIA.

An autem Hierosolymorum Patriarcha Suffraganeos sibi nullo medio subiectos habuerit, si petas, id multas ob rationes nobis valde dubium esse ingenuè fatebimur, saltem per hujus Notitiæ tempora. Quis enim ejus conditionis provinciam ullo in antiquo codice reperiit? Antiqua certè est hujusce Patriarchatus Notitia Græca, quam ex Vaticano in secunda hujus operis parte dabimus: Sed non nisi tres in ea Provinciæ leguntur, Cæsareæ, Scythopolis, & Petra, in quibus Hierosolymitanus Antistes non Metropolitanica jura, sed Patriarchalia exercebat, nullis ei propriis assignatis sedibus Episcopalibus, circa quas Metropolitanæ curam gereret. Scio equidem posterioribus seculis tres huic istiusmodi sedes subiectas extitisse, nimirum Bethleemitanam, Ebronensem, & Lyddensem: sed aliter sex prioribus seculis rem se habuisse ex hoc satis colligitur, quod apud Bethleem nullus tunc sederet Episcopus, nullaque ejus in antiquis Notitiis memoria sit. Commune sane fuit tribus primis verisque Patriarchis propriam regere Provinciam: & ratio est, quod ab initio totius regionis in qua sedebant ipsi essent Metropolitanæ. Sed longè diversa fuit duorum recentiorum conditio, Constantinopolitani nimirum & Hierosolymitani, qui cum ex prima institutione Metropolitanæ non essent, id authoritatis nonnisi post multa secula sortiti sunt; sed tantum dignitatem seu auctoritatem eminentem, qua cæteris præcellerent, universamque diocesim Patriarchalem superiori jure administrarent. Istud de Constantinopolitano superius probavimus: de Hierosolymitano verò res tantò certior est, quod vicinæ omnes Hierosolymis Episcopales sedes alicui ex tribus supradictis Metropolitanis in antiquis Notitiis Græcis subiectæ reperiantur. Quæ autem sub unoquoque antiquitus fuerint, in Notitia ex Conciliis historiaque Ecclesiastica extrahenda mox subjungemus, sed prius hujusce Patriarchalis sedis Episcopos per ordinem recenscamus.

HIERO-

NOTÆ LUCE HOLSTENII.

<sup>1</sup> Plenissimam tandem Patriarchalem dignitatem obtinuit in quinta Synodo Constantinopolitana tempore Vigili Papæ, ut refert Gulielmus Tyrius lib. 28. cap. 2. & Baronius ad annum Christi 553. num. 245. tum enim quatuor illi attributæ fuere Metropoles, quarum duæ Antiocheno PP. subtractæ fuerant, Cæsareæ & Scythopolis, duæ Alexandri-

no, Petra sive Rabba Moabitis, & Bosra Arabiæ. Dati etiam fuere Suffraganei partim vicinis Sedibus adempti, partim ex integro erecti: atque hanc faciem Sedis Hierosolymitanæ exhibet Notitia Græca manuscripta Bibliothecæ Vaticanæ, quam noster hic mutilam exhibet in appendice, eademque extat in Notitia Latina append. pag. 72.